

# Dr. Rujhan: Malaysia boleh capai KNK 5 peratus

KUCHING, Isnin — Langkah kerajaan mempertingkatkan dan menggalakkan perbelanjaan sektor awam dan pengguna dengan peruntukan yang tinggi dijangka mampu menyumbang kepada peningkatan Keluaran Negara Kasar (KNK) Malaysia sehingga mencapai 5 peratus pada tahun ini.

Timbalan Dekan, Fakulti Ekonomi dan Perniagaan, Universiti Malaysia Sarawak (UNIMAS), Dr. Rujhan Mustafa berkata, unjuran pertumbuhan KNK itu adalah berdasarkan kesungguhan kerajaan Malaysia untuk memperkukuh dan mempercepat pertumbuhan ekonomi Malaysia seperti yang dibentangkan dalam Belanjawan 2000.

Menurut beliau, ramalan awal kadar pertumbuhan KNK untuk tahun ini adalah meningkat antara 1 hingga 2 peratus berbanding penguncupan -7.5 peratus pada tahun lalu.

"Institut Penyelidikan Ekonomi Malaysia (MIER) pula meramalkan kadar KNK negara adalah pada sekitar 4 peratus manakala jangkaan baru kerajaan telah dipinda kepada anggaran 4.7 peratus pada Belanjawan 2000 yang telah dibentangkan oleh Menteri Kewangan Pertama, Tun Daim Zainuddin baru-baru ini," katanya dalam kenyataan yang difakskan ke *Utusan Sarawak* dari Kaohsiung, Taiwan, hari ini.

Dr. Rujhan berkata, krisis ekonomi yang telah melanda Asia semenjak pertengahan 1997 telah menurunkan kadar pertumbuhan Keluaran Negara Kasar (KNK) bagi kebanyakan negara Asia tahun lalu.

Katanya, ketika krisis ekonomi, KNK negara Asia yang lain telah mengalami penguncupan

mendadak seperti Singapura mengalami kejatuhan 0.3 peratus, Thailand (-10 peratus), Indonesia (-13.2 peratus) dan Filipina (-0.5 peratus).

Walau bagaimanapun menurut Dr. Rujhan, pertumbuhan ekonomi negara-negara Asia yang dilanda krisis termasuk Malaysia dijangka terus pulih.

"Tindakan negara-negara Asia yang menitikberatkan perbelanjaan sektor awam dan pengguna dalam dasar fiskal ekonomi masing-masing telah membantu pemulihan ekonomi negara terbabit.

"Kecuali Indonesia yang baru sahaja menamatkan pertikaian politik yang diramalkan akan meneruskan pertumbuhan di bawah 1 peratus," katanya.

Dr. Rujhan berkata, negara-negara lain di Asia dijangka menamatkan tahun 1999 dengan nilai peratusan KNK yang lebih baik, "Filipina dijangka pulih sekitar 3 peratus, Thailand 4.3 peratus dan Singapura sekitar 6 peratus," katanya.

Menurut beliau, ekonomi Malaysia yang telah mula keluar dari krisis dengan pertumbuhan positif buat kali pertama pada suku tahun kedua ini dengan 4.1 peratus dijangka terus bertambah baik bagi suku ketiga tahun ini dengan kadar 9 peratus.

"Peningkatan ini adalah banyak bergantung kepada usaha kerajaan yang menekankan kaedah perbelanjaan sektor awam dan pengguna sebagai strategi pemulihan serta dibantu oleh penurunan kadar faedah dan kadar ringgit yang tetap berbanding dengan dolar AS," katanya.

Beliau berkata, imbalan dagangan juga

telah berpihak kepada Malaysia apabila kadar eksport telah menunjukkan permintaan yang tinggi kepada produk elektrik dan elektronik dari luar negara dan ini telah membantu ekonomi Malaysia memasuki era pemulihan.

Selain itu menurut, Dr. Rujhan, kerajaan juga telah memutuskan untuk meneruskan bentuk belanjawan defisit sebanyak RM13.97 bilion semata-mata untuk kemudahan dan kelegaan rakyat.

Langkah kerajaan menyokong program pembasmian kemiskinan, galakan untuk sektor pembinaan, penyediaan infrastruktur dan sektor hartanah dijangka memacu Malaysia ke arah kuasa pertumbuhan baru, katanya.

"Kuasa beli pengguna akan bertambah bila kerajaan menaikkan gaji kakitangan kerajaan sebanyak 10 peratus dan pemberian bonus sebulan gaji atau minimum RM1000 dalam Belanjawan 2000," katanya.

Menurut beliau, ketiadaan cukai baru yang dikenakan serta pemotongan cukai pendapatan individu sebanyak 1 peratus pastinya melegakan hati banyak pihak dan pegawai berpendapatan rendah sudah tentu merasa lega dengan pelepasan cukai pendapatan yang diumumkan.

"Langkah ini dijangka terus meningkatkan kuasa beli pengguna dan sekali gus mempercepat usaha pemulihan ekonomi," katanya.

Sehubungan itu, beliau berkata, rakyat perlu terus menyokong usaha pemulihan ekonomi dengan memperluas pertumbuhan dan meningkatkan permintaan domestik agar lebih dagangan positif akan bertambah baik.